

范
伯
子
詩
集

范伯子詩集十二

通州范當世

光緒二十五年己亥八月至廣東不果留滯上海作

屬師曾圖耕陽阡於扇頭泣志數語

嗚呼父兒今上路誰與守父墓圖墓門寄虛慕慕亦有窮時哀來亦有住人間逢懽場母然棄此而不顧

爲徐積餘題王淵雅夫婦所書前後赤壁賦卷子內人同作

文章應時出撫擬喪天真揚班踵相襲獨嘯知無人河洲化遠矣矣鄙傷人倫雄聲有孤唱孰則鳴相親諒哉天地間生才良苦辛一者尙難遇駢羅甯不珍徐君授斯卷文采何璘斌眉山之所作乘時若鳳麟前無百古範後者開無垠爲之殆於化解此亦天民王生好夫

婦妙墨對紛綸當時寫且讀意味何津津惜哉我與姚對此皆成陳
空辭本無用况以闌幃身乾嘉盛文藻楞伽故樂貧如以一雙蝶而
遊草木春時乎地天凍萬物皆沉淪誰於晦冥夜猶見鴛鴦振境盡
亦須拓意平無待伸風聲與月色造物終能仁曷不共茲賦同爲後
世塵

孫松泉先生吾幼所師也愛惜廉隅不與人世通者數十年會
余將至廣東投四詩問訊感而和之

擾擾紅塵有萬家一儒清絕已無加誰從灼石流金地更把先生冷
面誇

門外滄桑一世中鄰家歌哭迭爲雄勞人自古頭先白造物原來非
不公

虛淡心閒日似年祇餘名節自矜憐冥靈便好論千壽一任羲和快
著鞭

客久揚舲狎海波不勞瀕發問如何適歸却話他鄉事應比吾鄉感
更多

與顧晝蕃同學在三十年前比復與之流連數日得先世遺墨
訓之以詩

秋風掃地盡物色澹中遺及爾重懽夜能忘乍見時淹留一世定生
滅萬緣奇至竟成何味蒼然念我師

世業還相寶搜羅故紙叢綿延一詩在契好萬年同未必吾身後懸
之子目中且須勤把盞珍惜月如弓

先君既葬出謝客徐積餘太守爲余兄弟籌生事甚摯及秋余

病未出門積餘太守復來視適見舍弟與同遊舊作在扇頭
者哀來感集依韻成詩

陽春只當凜秋過冉冉秋來更奈何眼有歡羣皆涕淚身無酒德亦
愧俄貧知日月銷精易病覺江湖隔路多今日孤兒管此味傷心甯
忍付流波

頽然老醜孰爲妍惜類憐才有大賢隔代聲香在邛索應時文藻滿
山川訂交河洛傳書日借筇燕雲括幣年願我恨多愁轉少勿將生
事溷籌邊

晚江馨樵

不共論文已卅年當時談讌最流連分明玉雪成黃土何況江淹老
在前

苦塊餘生百不驚聊因君死觸生平一窻硯墨終餘味何處天涯求
友聲

與沈愛滄兄念其女婿林瞰谷而有去年今日之歎愛滄亦泣
然誦此二十八字以同余悲遂贈一首

問我詩懷已淚零去年今日更堪聽陸沉風雨桃花面小照乾坤腐
草螢百不相謀成沉澹萬無可說況峇丁侯官太保遺風在聊與蒼
茫泣素馨

余至上海晤敬如適亦遭兄喪泣然相弔不遑問他事徒見其
索債者盈門爲解紛而已已而流連至重九稍復感時論事
謀遣兩家子同就西塾登高遺哀作詩相慰喻余次其韻

從古騷人易感秋那知今日更無愁雲霞幻此無邊壑天地翻如不

繫舟花鳥嫣然吾老矣稻魚足否子歸休餘生莫奈懷忠孝奴虜公
侯不可求

竟作詩人已可哀催租例與興俱來壺中日月千年祚雲裏金銀萬
丈臺灑血且完前死事搏心更拓後生才同懷爾我今無讓投老齏
鹽亦壯哉

余居欣父署中其三郎賓基臥病一粟庵未之見也而次余狼
山燕遊詩以陳情且要余和賓之外舅秦君煙鋏先生與余
別十年鬚髮白矣亦以扇索詩遂作一篇且以砭賓基出世
之語

王生老人產六男奇局倍於乾坤三清奇濃澹無不有都與范叔論
青藍范叔平生無不與就中獨數賓也貪公然欲以長句勝值吾懈

散來雄酣吾時淚乾不能哭懇語相弔非所堪所以雲煙遇骨肉嬾
復就汝城東庵汝聞吾來病欲起望吾詩册心焉耽豈知吾道在今
日黼家黻國言之慙語汝英髦糞土置汝有息壤鍾山南不然崇爲
最初義却向心地真濡涵如歛海波作鹽酪流入百味成芳甘天下
洵洵死喪至真宜戰鬪無空談少年肯聽老人語見若鹹苦耐咀含
與汝婦翁十年別兩鬢霜雪何鬢鬢揖我謂我必有贈肺腑所出茲
能諳王生老人限驥足猶望駿子飛雲驂千里百里各自置深語連
夕窮幽覃人間那容出世事疑此諸老非狂慙重陽菊花與三笑毋
以一粟禪同參

敬如席上和方小汀孝廉

出門日有構對面皆各天蜉蝣自楚楚鴛鴦自翩翩觀其大小異中

皆不自堅朝菌與夏蟲烏能超氣先牛眠隴底草懶散不容鞭所食
至微約頗視羣兒賢天方縱淫暴此道亦淺淺朝來擁書臥客夢驚
寒甍登高送佳節蒼茫覽風煙樂事不可道憂來無窮邊附郭訪蘇
季家無二頃田結交乃奇絕一老情綿綿不俟問訊罷遂成水乳緣
所惜爲時晚枉用歡連連天邊落日去光景無人傳

次韻王義門景沂見贈之作

江湖是何風漂流滿蓬梗豈無迴瀾才使汝不得還寒星夜相照餘
耀自耿耿殘陽入九地曾無繫天綆路逢傷心人欲語輒悲哽灑泣
念所私往復共酩酊王生爾何來華鐙照耀影淮南有草廬曷不遂
幽屏烈烈好丈夫饑來失剛頤四民皆瘡痍國成定誰乘海隅多大
風午夜寒入頸好會甯弗珍死喪在俄頃造物界我能厚通木有癭

眞當學老漁生計一答簪

同義門和敬如

遊罷玉鉤斜來觀海上花晨辭博士職暮訪張窩槎有儒一生者與之三歎嗟言從酒家壁乘醉浪塗鴉

黃海不知深誰歎量素襟秋期一輪月積水照人心道好不相喻才高定見侵古來離世者有爲獨沉吟

學方老醉歌贈敬如且俾戲示愛滄公子

江風海雨天正昏酒闌燈燼人無言明星三五在雲裏出沒深夜孤光存爾我何爲共茲世豈不懽然令可繼墮地辛酸有同異百年強半爲生計蘇季欲以東周興哀哀王赧今無勢康莊大第生荆榛駟衍微言又誰契我歷人間徑途百自求饑凍非人迫今我何從續將

伯爾今猶是信陵客豈忍妻孥入門責問渠應有周身策

酬愛滄

人間拔山事君子一毫毛毫毛不足贈誼比雲天高此事古來有每
與時會遭如彼青陽屆春風吹李桃物情自然洽百鳥求其曹嚴霜
一披拂萬物不堅牢蒼鷹擊雲路饑鴉相喧嘈芳林舊朋類泯沒如
奔逃哀哉風皇子苦竹風颺颺我無醴泉血與子充醪醪猶將瑞圖
意爲我三啼號文章寸心物得失本秋毫但俾拯人死毋爲說士豪

感事依愛滄所用丁字韻

不用文章付六丁著書無地不飄零殘花急雨重衾到破葉驚風故
紙聽新語未能妨美睡舊儻何意惜微馨茫茫黑海天難問閃爍還
爲自照瑩

義門忽然去揚州而携余稿於江上誦之且題一詩以相寄疊
丁字韻奉答因述所聞

談笑朝朝有白丁王郎蹤跡忽飄零海天帆影紛難下江介詩聲朗
可聽知否雁來傳警響毋徒麝死戀餘馨揚州廢苑秋何似獨數隋
家有剩螢

苦雨牢愁和方小汀述事

亂世爲儒詎可安更將真態與人看唇焦舌敝無來日意懶心灰有
此懽豎子母爲縱饕餮馮生大抵悟邯鄲若將淚與秋霖注后土何
時更得乾

湖南黃曉秋戶部以詩相見意氣甚豪宕也余感時而惜其才

卽席奉詒

哀今字縣失人豪把酒論文氣不高入世忽如觀露電擁花危與坐
風濤人情未必忘諸相天意何因篤若曹眞有一夫能敵萬華鐙綺
席夜橫刀

題季直所繪四圖

鶴芝變相

氣至誰能外將迎有苦心摩天惜高翮拔地礙重陰骨采猶能壽埃
塵迴不侵善龜爾同類欲變尙沉吟

桂杏空心

后土無全力春秋不汝培從來大木死只在寸心灰好日乘天逝嚴
風動地來猶虞歲寒友難復共深盃

水草藏毒

昔我行天下都謀城郭居甯知爲世患不必與人疏物濕慝難滅行
危更易狙何當萬馬踐昭曠俾無餘

幼小垂涎

得餅朝朝樂爭梨處處啼如何令幼稚真不羨糖餅嗜至天猶聽機
深業盡迷未妨傾汝實一笑看排擠

丁字韻作者數十搜索盡矣林菽原復來徵和強試成吟居然
哀惻所謂詩鐘派也

向來花事付園丁曾未看花雨旣零素壁并無天可問空絃猶有客
能聽生愁雲杳身無類剩恨霜悽德不馨萬事已同秋扇棄暴風還
復打流螢

題查皕師先德畫梅

珍藏遺墨老鳧師雪海寒香意格奇
閱道咸同至今日能逃劫火更
增詩

烟海茫茫一家著平生所剩又毫芒
吟成冰雪誠何用歎絕當時范
履霜

讀愛滄濤園詩集

豁然峯幙對披真修竹天寒絕代人
但把庸言參本味萬年不到語
成陳

濤園亦有蛟龍氣積水翻無跋浪痕
要語冀州重筆削不將鼉紫論

濤園

華父先生見附有並時馳
勛者閔位竈與紫二語

記濤園詩後兼喜晤令姪丹曾

東坡豈非出頭者南軒別是跨竈兒
何爲有此兩魂絕還付人間百

不知醇酒婦人死無爾肥魚大蛤生啗之衆中難覓封侯相得見公
孫又一奇

愛滄從余索糖食攜之往談詩竟忘却又攜反也加一詩送之
袖挈糖餽反渾忘一餉嬉好朋是兄弟此老本嬰兒慘慘風雲錯悠
悠天地隨邱柯如可蹈宴樂復何疑

有感疊前韻示愛滄

謂解淫荒趣番番與子嬉終留寒乞相笑煞風塵兒苦樂一心置低
昂萬事隨眼前樓上下論定不須疑

敬如索代贈

萬紫千紅競及春嬌啼浪笑太無因看渠一點棲皇淚百尺樓頭九

鼎人

英雄畢竟數陳湯
婉變猶當是李香
宴樂已非流俗事
不論真感更茫茫

題季直荷鋤圖

畫中眉眼吾能識
共是長鑱託命人
絮語皋夔三十載
一燈今夜話悲辛

有生畢竟兩餐足
識字橫教千慮侵
連隴蒼煙耕不得
可憐還作荷鋤吟

同何眉孫張季直夜登狼山宿海月處

江海既會聲喧
歷雙流競地生
民災狼山如闔
當江開能喝海
若驚濤回引江入
田灌萬頃此德
萬古常崔嵬何
哉六籍功不紀
尋碑訪碣無詩
材乃知地亦以
人重老蚌千年
珠未胎可笑子
瞻宦遊懶遠

送不越金焦來子之發源我收蓄逸閑四姓重追陪何君弗謂惠泉
好持吾茗盞銜吾盃毋言臨江獨私有從古據地爭雄魁張君吾以
海東讓千歲斥鹵茲能培一日和甘盡作稼亦能稍釋胸中哀丈夫
弗假風雲助遂以白地明天才吾皇釋政後一歲己亥冬至狼山隈
有吾三人夜秉燭走訪衲友尋初梅會以茲山萬萬古勿與五嶽爲
陪臺

贈何眉孫

子昔避亂家吾州日對狼山不一遊我友十九皆子儔偶一見子終
未投平生頗作兩端語朋友山水吾兼收得之便欲性命以澹處亦
若烟雲浮凡百所合固有命舉步遲速非人謀一日歡然未云短百
歲共處甯爲修名聲相聞義有死言語或失恩成讎以此充然樂今

日與子笑浪南山頭青山果然耐霜雪君子白髮心悠悠邱軻要有
從容意不逐奔潮日夕流

看保安沙還至上海和敬如見懷

爲別四五日六日甫至止一日山中臥一日走江汜兩日風雨中水
深沒車軌去其往還日實祇四日耳何張於吾人良非等閑比新慳
入故羣磊磊真可喜雖然相從樂豈不念吾子人聞子名者循例欲
謗嘗論子口則箝不論腹有痞沉思世賢萬取足一知己盡人而費
辭是亦可以已飲河期滿腹不得盡河水甯獨吾道然子意亦如此
取子之赤心照地立人紀得時亘光芒不得伏而死空空是非間卽
是安足理緣子詩念吾還辭以喻指

敬如和余詩獨取人聞子名者循例欲謗嘗二語痛切言之夜

燈諷誦感不絕於心輒復將此二語散爲五言絕句十首所謂長言之不足則詠歎之者也

世上皆安樂而君獨苦辛明明日月照莫辨汝爲人
史遷七十傳獨服李將軍桃李不言者名聲天下聞
陳湯一樹奇百謗猶能理無命復摧之塵埃老吾子
子有一樽酒與之忘死生胸中已無物身後亦無名
何哉今人言智出庸人下彼固落拓人我非狂癡者
風俗庶民事於今逮搢紳言言從所授邑邑自相循
日慘天茫茫人間定何世吾當寬論人子弗進苛例
平心論吾曹誰能補時局所爭在有志豈必定無欲
時王欲侯汝甯知汝悽愴此意人不聞有聞亦資謗

哦詩以送日好醜率吾指方知此道寬無人橫相訾

欣父席上應諸公詠雪之屬用敬如韻

酒家高樓當大道我友消寒命同好捲幕驚看瑞雪飛擎盃覓句求
詩老窮陰不散此何時鏤肝刻腎真癡兒羣公竊把玉龍戲徒我寸
鐵無教持問天知否天無恙羅賓不見公孫相賸有平章詩事人嘗
肩瑟縮江湖上江濤入海必翻瀾彌天作凍知應難明日顛風激狂
浪愁君未忍憑高看我欲結廬向幽境有田論畝不論頃紅雨春槽
稻米肥綠窻夜詠梅花靜不然高語出塵埃於今海上無蓬萊瓊樓
玉宇寒深矣何處乘風歸去來

星濤席上疊韻奉詒兼待遜庵兄至

酒邊人是東西道眼底歡娛未云好要共迢迢千歲憂纔保區區百

年老結交始自青春時握手相視皆男兒半作落花天所命一爲飛絮風難持漢陽獨樹春無恙批根削迹窮諸相世態傳之阿堵中逸情高出雲天上沈生才氣如翻瀾等閒一顧應知難把君氣味逢人說剖我心腸與衆看古人所寶文章境豈與小夫競俄頃對面相看秦華低發聲一奏雷霆靜於今萬象昏煙埃曷不將身隱草萊熬煎世事一樽酒留待明朝舊雨來

和敬如四絕

看君日日飲無何叔末年光事不多欸欸輕輕一背雪豈知滄海又增波

君積詩篇有幾何吾人終不患才多先生縱讓登高賦平地猶能作一波

陸賈南行事若何昔遊所得已無多君恩濺濺九天露相度汪汪千頃波

古來滄漚問誰何海市於今萬倍多我欲乘湖溯三泖不知何處有涼波

消寒第二集同人屬余先賦仍用敬如調而易其韻

世事於今更繁促甚則朝娛吁而哭三日之約胡逍遙真到樽前願已足開樽聽我消寒吟不論家國毋言心高車大馬美衣食千年萬載爲荒淫洪生爾毋惜毛羽東門才子安足數彼亦一是此一非總爲文章賤如土陳生萬里天南行苗民拜舞山靈驚富媪之藏恣汝取髮白返黑黃金成談忠說孝吾知妄泣血孤兒首無狀負米奔波尙有辭當筵慷慨真能忘昨聞羊酒會西鄰爆竹聲聲已換年若我

消寒消不盡無從乞與別家春

再疊道字韻贈遜庵兄

昔聞萬里雲南道不與中邦論醜好一云吾兄持節行忽向樽前鬢
愁老憶昔當君壯盛時顧我相傍猶嬰兒性情扶携嘿相喻歲月拋
撇鷗難持天南地北君無恙論才應作濟時相數載馳驅闕關開一
官落拓秦淮上無端大海飛狂瀾客子因悲行路難唇舌如雲不我
釋肝腸沃雪與君看歸來歷盡艱虞境不復歡言一時頃百里川原
亦阻深相望不見心猶靜駟虬乘鸞絕風埃更向遐荒闢草萊記否
琴臺深夜語得閒應肯附書來

贈愛滄

四方上下一東野百里東西兩上游舊用詼諧今則哭

昔翻姚錫九
用此意也

醉將拋撇醒難休翻翻棋局論千變轉轉車輪有萬周雪後臨溪眞
異事凍魚如欲煦泥鯁

愛滄席上贈林紓琴南卽撰茶花女遺事者

騷人欲炫芳蘭佩巧向樽前併一歡豈識廿年同味者更從海外異

書看

渠於吾鄉同客吳武
壯諸子皆心識久也

條支弱水荒唐甚碧海青天夜夜同莫把茶花問葩籍言言都在國

風中

消寒第三集詠日本小田切所謂滬上四假者

假眉

物罕而見珍人多始爲貴子謂眉眼須天然女閩三百皆有眉娟娟
云何東西比屋住曾無千乘萬騎來喧闐人之來爲君美美由人君

知否濃粧大樣高
嵯峨傳動珠履相經過
徐察妙美飛橫波
芳言馥語蘭氣和
傾身更獻千金歌
東家美人蹙雙蛾
妍心不見君如何

假拳

酒酣不得住
拇戰聲聲怒構會
亦有時研摩勇相赴
勝則仰而鳴敗者
飲如數二五一十間
常悲士不遇
誰家公子來酒場
昂頭揜袖神飛揚
舉盃屬客客先畏
九籌十勝難禁當
美人如花笑一旁
笑客草草難具防
豈知手眼唇舌一時到
祇有風聲鶴唳凌虛翔
客自先將杵投白夫也
那弗雖脫囊方知此事亦天縱
不得從他論短長

假應酬

出門兮百道車不嫻兮馬不曉
對面兮各天山則深兮水則淵
彼何人兮習習舞舞當筵兮徧給身之傀儡
觀者娛水與蜻蜒不相入

假書法

有儒一生擅書名賈客販鬻王侯迎窮力臨撫不能肖所以筆法傳
後生生來汝以筆畫地低昂肥瘦任汝置先作欄杆後畫墁從容點
綴看成媚作字應無千載期世間版刻晉人爲歐顏米蔡都無遺安
得更論羲獻之先生聊以給羣兒

贈吳彥復

以行得官以言去古人如此亦堂堂看渠八海橫飛日更向萬山深
處藏何由黑髮看成白應許玄天不作黃試把遺書往沉誦逸民儔
侶自成行

適與洪蔭之觀遊歷東洋日記而哭自傷我亦蠅營苟苟亡國
之人也而不能保其命而眼中之人可忠可孝更無人焉保

全之俾老斯土而全厥名也恪士和宋燕生之詩在旁嗚咽
而次其韻

宋生慷慨憂時者聞道今猶一飯艱翹首天虛疑有路閉門海上望
無山沉思百變真何術試想羣材盡不凡竟作邱軻論管葛不能揮
手米鹽間

笑把山童河水涸看他魚鳥不飛驚胸中未必餘羣輩世外真當有
六經暮雨朝曦渾不定春潮臘雪暗相生西山一調無人續多恐明
朝話柄成

吾粵館既爲剛相所裁亦不謀從李相再之粵惟欲就近得一
館以養老母愛滄恪士星濤三弟者既極爲之謀而遜庵兄
及余晉珊杜雲秋皆有意焉所求至少而得朋若是之多一

何可笑格士別有詩索余和更次其韻以明并不惜自薦云

爾

憑臨江海猶虞渴此事真當問數賢奄忽十旬渾似夢相望百里遠
於天可憐烏哺爭餘日欲退鵬飛就少年寄語箝車身似硯不須辛
苦更求田

贈秦煙鋏

無榮無辱垂垂老亦有非常在眼中祇博閒人論功罪體多用少一
聲同

東坡生日王義門置酒次東坡和王郎慶生日詩韻座中有趙
善夫楊功甫及敬如也

飛書馳檄望風趨羅向樽前盡友于剩臘一句窮節候雄文千載舊

規樞王郎置酒仍前事趙子吟詩尙腐儒陳孟公能從陋巷范滂甫
亦脫經鄆債多莫作登臺計道喪休乘浮海桴席上人人携鳳侶袖
中各各有驪珠喜瞻髯叟顏如昨更作吟朋吻不枯寄語西州楊道
士要添蜜釀作膏腴

東坡生日卽消寒第六集敬如爲長歌甚有高致余轉自愧其
才思枯竭不能和也無已復用前韻疊一首贈之

長吟累月筆花枯更設鸞樽學拜趨四海鈍人成此會萬年閒事禮
前儒詩書醞釀於今薄笠屐風流與衆樵仙去難留天上曲神遊焉
到海中郭齊王竿好無須瑟博望槎成不用桴愁入滄溟都化水淚
隨咳唾盡成珠誰能送日猶憑此暫試因風一唱于吾服季常真耐
凍歌殘字字擷華腴

善夫歎

悲風颯颯吹江湖天日下墮人無徒聲沉響絕猶艱虞稱名不敢造
相呼漢劉周姬笑自誣載之文字將何如涉筆欲下心躊躇抑思名
字與人俱不論真假論賢愚愚者一死皆掃除賢百其號人盡譽善
夫有味如醜酬善夫詩亦清而腴善夫勉旃沉寂餘後令蠻貊無輕
儒名有似者實則殊請看當日宋潛虛何如此問趙善夫

東坡生日臨觴有感復和敬如

迢迢閱世徒增悲人欲不死將何爲假令髯翁到今在恐其一日無
仲眉翁年八百六十四飄忽人代成今時笙歌譙笑極喪亂縱橫歷
覽皆無之祇言新法亂人紀詎謂舊學誅民彝公平來遊聽我告安
石正論經天垂不佞天人不法祖徹骨剖辨無瑕疵儻教歐馬數君

者與共責難愛來茲一君一相必有職千變萬變皆非奇當時堂堂
宋天子將與萬國爲軒羲人言我窮爲公故甯知在政不在詩天仙
化人一方語今來竟作奸邪資誰能頑然守深黑無與日月同奔馳
舉觴爲公祝千歲悵念來日傷肝脾曾是淵源一江水聊以弟子諄
其師

走筆書事卽以謝同人之招

全河已落漁人手細小還爲巨者吞路盡人人偷作計哀來一一告
無門空能手寫雲天意更把身留雪地痕覽物潛然况悲已忍從諸
子笑擎樽

方小汀新歸追爲東坡壽詩索和遂次其韻

聲聲臘鼓催除年騷壇壯者皆不前獨絃哀歌向誰賣回舟就我方

翁賢方翁平生有孝子養親魚酒必鮮美晚歲拋書更弄孫含飴樂
事真無比此間宴樂蘇文忠方翁恨不與其中作詩往復敘年譜曲
辭媚悅來求通我方醉歌作鐫議爲汝更得諛斯翁蘇翁蘇翁祝汝
從此千萬秋著述磊磊長存留弗遭烈火一焚盡弗與洪水同漂流
原來吾道竟微細難比天地真悠悠豪賢不保千歲運立邱天豈猶
含愁不然吾詩富今代豈與卒歲同少謀便當伸眉向天下何用對
客常低頭

題陳鷗民漢江課漁圖故人陳宇初之族兄也

陳生字有鷗民者日逐閒鷗泛水雲記向空江牢閉口怕排鉤黨到
鷗羣

故人陳慥今何似聞說專城不救貧曷不分渠半江水白頭兄弟老

垂綸

鷗民敬如哲甫爲三陳合譜屬余題端

傳盃海上日千場到此論交足涕滂啼笑都爲一時計姓名何俟詰
朝忘誰知勝友金蘭會兼親名家水木光三子同心吾作證最能垂
代溢芬芳

消寒第七集

百國皆是青春人獨我殘年未教送歲月日誰爲之積習如山推
不動路旁喜遇同歲翁問齒猶能退居仲十年白髮提前生便作童
孩亦安用高衙馳檄追笙歌朱榜煌煌已停訟如彼甌脫無誰論人
間得此歡娛空老寡泣血胡歸休子莫啼冤冤者衆四海瘡痍今若
何九疑雲物皆如夢不能暖竈取一歡醉死樽前氣猶洞

評黃駿孫太守歸田近作兼題黃曉秋戶部瓦缶集駿孫集中
多錄曉秋作也

苟祿蚩蚩絕可憐論人先問掛冠年況能磊磊披肝肺涕笑縱橫卅
八篇

吾欲觀人觀所與佩於騷士必蘭蓀微陽不轉黃鍾死瓦缶哀鳴欲
斷魂

慎交吟贈敬如義門兼視善夫

朝朝騎馬能相過交到死時無一個君今未死何由知正看生時作
死時世上何嘗有生友只作生交宜住手苟無千秋萬歲心與之一
日猶爲久陳生語汝慎交吟王郎勸汝盃中酒王郎作弟陳作兄徹
骨吾能知性情果然識字同憂患且復論才託死生不然有若宋夫

子不見知名見亦喜
宙合紛綸固有人
錯雜相看斯可矣
嗟吾不自惜其詩
割雞焉用牛刀爲
正苦天人墮塵瀾
再三珍重話臨歧

與善夫一席話歸來猶心痛也疊送字韻

有臣偷欲忘其君
僅保頭顱未教送
有子偷欲忘其親
忍使肝腸寂無動
一朝相遇淚滂沱
矢志忘魂相伯仲
空能言語似蘇黃
真到古人亦安用
醫和死絕巫咸歸
天路茫茫與誰訟
我言三樂已無頭
子遺八口半猶空
一口相從亦累人
不然何必吾從衆
各把是心牢守之
更背妻孥自尋夢
要能磊落戰餘年
大火當前顏色洞

訓清夫道人洪述祖

百體爲我稍延留
牙齒紛紛先乞休
槎牙大餅不能截
當筵獨啖甜饅頭
脂勻質膩味疏爽
湯飯可厭膏粱羞
我初貪饗後退却
祇問賓

客能買不求之市上百無有誰家庖厨爲此謀洪生越日卽我飲盛
筐百個來相投云此甘芳不易變能作慈親十日膳我聞驚拜感且
泣子之佑我如何酬意重君羹小人食德爲玉瓊中黃流洪生有母
不及養惟日惻惻知人求耳聞目見有春在可以稍釋胸中秋我獨
何爲自言老與子德意相謬悠還家會當博母喜來日致命同君遊

謝人贈人參糖精

誰將聖藥惠高年三世醫家有秘傳苦口累人甘亦得祇憑誠意足
回天

留別義門兼約明春携大兒來滬相見

子今行否吾歸矣柳色萌芽會於此平生十約九不還人事則然非
予恥所以尋常一分手也用低回不能已比德論才作弟兄祇須並

世何關齒吾兒後君纔三年吾意離君尙千里會當教君看孔融未
必勞君拜陳紀

范伯子詩卷十三

光緒二十五年己亥遲粵脩不

子三月還家作

果然

一紙相看事果然朝娛肝哭到窮年遊絲忽落三千丈錦瑟真成五十絃
老寡可憐垂涕晚大僚應記受恩偏愚生只把春王筆載自堯
天入舜天

書賈人語

去卽去耳誰爲賢人如綠草生春田鎌刀割盡還須長不聞但有今
歲無來年東家獨患囊無錢傭保雜作何有焉請看朝廷沒曾左也

有後相來聯翩我聞此語悅失色從此昆命泰華皆不堅明朝便叱
玉皇退何能一帝專諸天

題陳鷗民月湖琵琶圖兼答其釣臺徵詩啓

郎官湖是青蓮造商婦絃爲白傅留漢水漁人真好事一圖兼攬兩
千秋

聞君別有徵詩具日傍琴臺望釣臺笑煞嚴光亦淪落不然甯用客
星來

臘月二十七日漫書

雪後從容復陰雨詩成懶散更歌行不知門外今何日便與樓頭送
此生老賈失時尋舊話童奴少事問書名無心撥盡一爐火不寐聽
殘五轉更兩境可能天不隔萬年難使物多情閉門習靜于風事却

撼虛窗故故鳴

余題月湖琵琶圖因及鈞臺集而有嚴光淪落之歎又引申之
而得歌詩十句

我笑嚴光鈞澤濱亦是天涯淪落人所以乘機一謁帝寫此辭勃方
藏身豈知帝星亘天上也有生命不及辰忽忽未知生可樂懨懨常
與死爲鄰等閑多少窮途淚可以飄飛化作塵

謝敬如念吾母

萬重冰雪裹誰者暖人心昔語多君智今來不我尋門闌天地隔車
轍海河深不敢望吾母勞君代叱吟

有母論饑飽孤兒罪更多文深徒繼繼勢在竟嵯峨孰使求高者能
如苟賤何勤勤將子意同淚與滄波

東愛滄

昨者應從白門至聞吾未歸弗駭耶人問失路安有限疑此未算窮
無加有母能慈有子好祇以不見爲嗟呀詩骨強於隼飛雪歸心急
似蟹爬沙門前一江化銀漢雲路盡絕天無槎只可相從復消夜與
君揮淚說京華

和善夫

怪底沿江水奔注四海平添淚人雨聖手無柯亦莫望佞頭擬劍教
誰鑄日光雲爛方賡歌誰解唐虞事若何尼山亦是阿諛者佛祖焉
能免罵訶

除夕詩狂自遣

歲歲年年有更換不見留光可稍玩惟獨今年除未除雄詩百首長

爲伴人言詩必窮而工知窮工詩詩工窮我窮遂無地可入我詩遂有天能通

我與子瞻爲曠蕩子瞻比我多一放我學山谷作道健山谷比我多一鍊惟有參之放鍊閒獨樹一幟非羞顏徑須直接元遺山不得下與吳王班

除夕無聊復次山谷還家呈伯氏詩以貽余仲

平生浪把千乘輕臨老方知一簞豆覲面獨有同饑人意態荒寒節物醜便將蟻力銜山來一歡已落啼號後况有衰顏七十親且晚念吾應更瘦汝弗浪愁虛費醫吾實慮汝一脚手閤吾不歸誰最驚蓬巷悽悽二三友亦有孤寡汝弗知告訴無門應罵詬吾非不從僕人言早計從容棄此走門庭羅掘會將窮鄰家稱貸亦何有明年誓將

爲人役不俟饑來始張口
摘文未至茅塞心作字無虞柳生肘誰能
與人作筐篋猶得逍遙辭鑠鈕
汝曹愛兄莫漫悲與汝安心一盃酒
十年肝腎吾能勞二分齒髮先吾朽
何況於今萬乘如飄風齊楚化
爲无是公長饑穀觶到吳儂
微命區區愁不從百變終能娛樂已世
間獨有馮公耳

與劉一山除夜深談贈之一詩并將以示彥升兄

不以俗子相繞纏不與家族同熬煎
祇以青燈照白話與子相對成
一年子之識力萬夫賢覺且有在鳴雞
先公卿攬子欲爲臂嗟子十
口何能捐平生小心結師友負累何止
千萬錢到今簿記百不省更
用三省常自鐫人間來日是何世
愁霖汜濫高無天園傭折花不能
賣蘭薰雪白何爲焉不然有若蕙修者
壯老一概窮當堅瞬獨胡緣

竟欲死隔海與我愁悵悵

一山以彥升來昔相示有生不如死之爲樂云云趙修亦彥升字也

元旦疊韻自占

怪怪奇奇盡偶然昏庸柄國已千年欲傾東海斟臣酒怕有西風拂
帝絃近死不知機發驟同憂奚俟夢來偏逃塵便與追前跡河上今
無一畝天

連陰十餘日夜忽無風而自霽雖僕輩猶知明日之復雨也

一雨十日不放晴紅日不出天無晴祈求想望已心死兀坐樓上甘
沉冥然燈燒燭照宵詠良久不聞檐溜聲童奴開門問雪否還走笑
言天不誠無端收空散雲霧直視萬里星光明吾聞沉陰若災禍每
至康復須威刑炎日斬斬施雷霆寒月刮地風崢嶸不風不霆只無
事何處頓成開霽形恐是陰類自怡悅拂拭后土便宵行請看凌晨

日欲上果然復雨如盆傾

以保生釐東薦之伯謙

李白韓愈浪得名子瞻山谷皆平平不然嶽崎歷落如我者焉得置之世上鴻毛輕雖然時選勢亦異依然同類相枯榮藉湜駸駸入文府秦晁往往句同賡貧窮陸離亦有會龍饑虎困風雲生可憐達者竟誰是祇有裴子食一城天哀其親俾得養亦俾其友從呼庚原嘗死矣平津絕羣士從容餓萃成何用千金買駿骨真能一飯揚名聲吾鄉如今有瑰寶襲列高價子所評種松十年冒霜雪凍骨漸與寒山撐吾雖半菽不獨飽忍能對作空腸鳴會將質裘持送似令就吾子天南征齊吾詩騷與將去還乞吾子持與諸家衡

保生伯謙舟人試通州所得士也

正月四日雨稍止一山拉入市買報閱之因晤諸子同飲次善

夫元日二首韻

乘春百物動公等意如何苦雨如相偈炎曦不再過妖姬猶傅粉羣

貴尙鳴珂遍奏迎神曲今宵樂事多

是夕迎財神
遍地喧闐

那得深山裏冥冥萬古天便將巢作姓不問舜何年忍死吟吾句含
悲入此筵茫然真一概莫道汝爲賢

敬如題漢陰課漁圖真妙作積欲和之而未有辭會其爲我營
歸計將成喜而徑書十二句并以結來滬同居之約

我歌獨有陳生尋爲絲爲桐成一琴升堂入室鏢鈕斷知心取意江
河深正憶康衢結交衆寸步艱難不汝送各以悲歡閱歲年傳盃天
地真如夢一波送我還江津股之活水魚鱗鱗范張已分能生死元
白將來合作鄰

善夫以次韻少陵杜鵑行索和余患詞意之將竭也用其韻爲

三足鳥行

君不見龍孫飛上天化爲日中三足鳥人間鳥生八九子惟有神物
難將雞蟾蜍東西但相望緘默不語甘羈孤人間烏鴉積此恨晨夕
出入悲啼呼汝羿已射九日落那不釋此常區區縱滅其形難滅影
到今反笑奸雄愚貫通三才作王字看渠能抹青天無看渠能抹青
天無不用怏怏持戈趨

與義門論詩文久之書二絕句

六籍英靈葬死灰憑虛喚得幾聲回絃歌已落伶人手豈憶尼山學
道來

最有空詞定樂哀網羅故實定非才請看燈雨檐花句便值高歌餓

死來

二詩蓋不接之常調以爲工部當時若作撥前細雨體花落便不成語言更值不得高歌餓死也聲音之道亦莫知其所以然

高才若從此悟入豈尙有死法可循哉

人日和杜公追酬高蜀州詩用其體韻

人間何日不興作何代無人怨淪落把手杜公人日篇感激淒傷淚
如昨遙遙大厯千年來人代相看已寥廓甯我獨無經世才知君亦
乏匡時略常將短札記經過更把長篇娛寂寞言懷稷契悲唐虞坐
想驂騮憶鵬鷲如今似我更無論漢中昭州無一存劉表能談周禮
樂趙佗不問漢乾坤朔風慄慄重陰覆西海滔滔萬溜奔天意甯嗟
腐敗士舊遊欲斷公侯門可憐世季生無賴要使饑驅道不尊尺水
漣漪復何有涸餘常此役驚魂

臨睡感題杜集

了知身世風馳過無奈當前日似年事至終須一笑遣吟成翻藉百
憂煎思君往矣真同物問我誰歎待後賢病體不勝爐火澹仍能辛
苦課宵眠

鎖日無聊疊韻寫意

爐中活火看全世簾裏飛烟幻百年硯墨滃然隨筆盡壺冰清絕爲
茶煎繁聲雜沓酬佳節小說淋漓有大賢昔日經過裘馬客不知誰
向酒家眠

寫詩與女壻陳師曾三疊前韻跋尾

不信人間許大事徐徐放下又經年雲天斷影紛難繪燈火殘膏尙
自煎未覺馬揚真可樂焉知牛李孰爲賢詩書麴蘖將安用醞釀老
夫成醉眠

有所聞並憤所見四疊前韻

似聞雲錦翻新樣并說珠襦類往年前席終無一籌展對觴誰免百
憂煎賜醢恩澤雖云濫博塞歡娛豈謂賢疑是諸公啖榆飽不然何
至抱薪眠

入此年忽忽又經旬矣時日之流驚心動魄五疊前韻示兒曹
要知元日須珍重涉夜侵晨是一年萬種去來皆恍惚百般苦樂與
熬煎陸沉酣豢原知誤瘠死清貧未必賢不有千春呼吸在何分一
醉短長眠

次韻杜公偈八行贈善夫

偈八復偈八我居滬南子滬北向者皆從何處來對人乃爾無顏色
自從開歲盛衣冠愈覺長途有荆棘天陰雨濕宜爲辭晴好依然行

不得一車縱難賃兩脚豈無力頻來看竹主應罵仍與借花賓不識
江頭士女如狂顛香車寶馬紛馳傳鳧飛鴈集莫比數遙望直入冥
濛天陳生吾黨類見面猶悲憐彼亦皇皇自求活那能日夕相歡然
忽憶與君是同歲瞬息便到知非年此間甯著爾許物撫己但合深
山眠好把出門賃車費竟作還家買權錢

感於東坡生日之作遂爲塾甫先生六十壽詩

人生百年一刹那賢愚貴賤同一科挈長量短其如何祝禱稱頌皆
私阿要使日月無空過聖哲自比庸愚多有儒一生高嵯峨墜地便
與書相磨浸濯滋潤成江河放之一州勤民痾晝執吏事晨自哦卽
飯仍與賓搓摩判簡披牘如交梭不肯俯首愬義娥猶嫌一官遭網
羅於世無補身受瘥立起自劾投烟蘿從此壹意知靡佗嗟彼豈誠

書有魔方今儒術資爲呵腐士不識真邱軻死守徒以來倒戈後有
萬年甯可訛濯而出之渾渾波奠置高阜平不頗用此憂勞鬢亦皤
獨與往聖留純和我年十九付蹉跎矧今傷心至蓼莪忍死惜淚吟
庭柯感念身世終滂沱會以生日觴東坡類引更爲先生歌

於三山會館觀所謂天后宮者

緣其兩楹大書天后傳
誕延招紳故有此作

賈舶沿江不惜錢閩人於此益拳拳神靈備著千番應譜牒猶能一
姓傳何但生男讓生女須知如帝又如天沒身一樣分喧寂愁絕當
時謝自然

方小汀將之館以其鄉味嚮客余與義門都以事默默深愧此
老之誠也退而爲詩以謝

渾然太璞黃塵裏一片肫誠綠酒前人各有憂應不識客將何好請

明度論着偏與醜鄉左置譯難將閩語傳等是餓驅歸未得滿街燈
月照離筵

元夜

元夜無人談月色古來崇此一宵鐙隻鷄斗酒吾何往野馬蒼天見
未曾小大並時真不異悲愉極處總無朋東家老叟情難却看轉風

輪到幾層

主人邀看走
馬燈故云耳

謝客難前韻

零星賸淚朝朝雨慘澹愁心夜夜燈語必朝廷人不解論關毫末爾
何曾饑寒自切身中事膠漆嗟無往日朋必欲憂天天不墮月華雲
爛一層層

讀報憤歎

羅者不知有寥廓應從藪澤視鶴鵬如何故作癡人夢捕兔而今向
月明

試想誰人甘作笑世間原有十分愚可憐鹿馬迷淒日除却傷心一

字無

人情愚至十分則九分愚者皆得勸之使不爲而十愚之事亦終不可得見也藉非有若趙高之狠戾何至傳笑天下如今日

乎之事

三山會館晤黃曉秋同飲方知其亦留滯此間翌日出其元日

試筆索和疊二首酬之

眼底應無狐白裘老夫向客只低頭昨來見爾三山館始復登吾百
尺樓鱸鮓勿因填海懼侏儒肯爲墮天愁依然碧草乘春至勞苦年
光酒一甌

處處笙歌起畫樓時平相業奠金甌正宜力取還鄉錦何更悲吟作

客裘凍折蓬萊天左股望穿苜蓿海西頭交疏未問行藏事約略分
吾一段愁

壽敬如三絕句

此才不爲君王使碎與窮途急難人不識門前須我否怕君還有債
紛綸

爲我奔波日數回忍能對面見君哀分應足繭聲嘶日更得關門覓
句來

今日聞君向弧且不能盃酒以詩通更成奢語從天祝歲歲年年作
苦同

正月二十一日盆花落東家老叟爲言節氣笑而深感其言適
善夫以和人日詩至遂疊此韻杜公酬蜀州正是日也

節氣不知誰所作，遞有時花任開落。祇須長年飽飯人，已識來今如去。昨况其高眼，凌青天。正把閒心置寥廓。雖然血氣與凡同，忍使流光概從略。近知愁苦卽歡娛，看徹繁華無寂寞。肥甘必欲慕穠糜，燕雀真能笑雕鶚。李杜詩才且莫論，彼有黑夜孤光存。微茫便似初三月，泯默還如六四坤。逮其胸中芒角出，遂使筆下風雲奔。此皆隨宜作生事，豈有要妙成專門。可歎諸公百不暇，使之千世獨稱尊。春至江南望楓色，青林仍有未招魂。

次韻敬如

送臘迎年把酒揮，澗旬累月尙無歸。空能跌宕生花筆，不復流連寸草暉。生死並論交卽少，行藏一悔夢都非。毋言雨霽勤相就，枉復緇塵日染衣。

晚覺寒甚敬如來則既春服矣再次前韻

魯陽戈鈍莫能揮
楚客魂離亦不歸
萬古雲霄成斷羽
一天星月燦餘暉
時危怕與心胸盡
老至愁看面目非
氣候陽和吾弗敵
却憐春半尙寒衣

三山會館赴小汀之招并約敬如送罕兒入西學堂次小汀韻
清談無復妓成圍
不醉猶能醒眼歸
學也固知無祿在天乎
安得與時違
老夫剩以文爲戲
平世終無淚可揮
箭激樓船滿江海
奮飛魚鳥或知幾

黃浦江感賦前韻

帶郭江灣祇一圍
湯湯八海水知歸
清談典午風猶在高會
春申願竟違
白日只教雲樣過
黃金真有土能揮
潮來浪去悲何限
百倍安

心是布衣

平心語

平生本無溫飽具白手乃望天之援宰相勤求盜物者吾屬見逮非
煩冤有身疲癯又不死與世祈乞終難言近想馮生各有賴自今不
復憂黎元

保少浦來上海吾意伯謙雖賢者亦不可褻裳就也勸姑歸讀
而和其途中三詩

忽向此間住真如粥飯僧文章今作戲時命古無憑明眼若觀火寒
軀自飲冰一春斷還往雙鬢益鬢鬢

汝已鑿饑慣今來何所爭勢衰高下僅道喪死生輕賸有一途在能
堪萬里行猶虞最爾邑無地著儒生

但向詩書去無論物態新空疏終病世昏憊不通神正與衰時盡仍
留古黛皺未應愁卽死除我亦空困

罕兒入法蘭西學堂以安息日出爲余述其間規矩之嚴甚樂
從也余亦甚慰明日復憂其暴改所習聲少浦韻戒勉之

禮失猶求野威儀看飯僧况其仁可學真與道爲憑執業若行水奉
身如履冰無然慙似我衰髮日鬅髻

看向前期去悠悠百不爭姓名羣士略啼笑一身輕獨念海之大願
隨天與行何時能挈汝遊覽足平生

忽於眠食處愁汝一番新總望形骸健休誇志氣神空腸毋水激削
面莫風皺但取從容樂何憂三百困

和劉峴莊尙書入都留別四首

不信人間叔末年羣公卿士若狂顛微陽耿耿孤忠動一髮沉沉大
義懸起自湖湘功在世坐深江海澤如淵歲寒愈有驚人節可以昭
回日月天

霜霰重重雨雪催莫知天宇幾時開黎元責望雖無厭白髮論思也
要才帝命還朝資贊畫公將乞病尙徘徊攀轅父老焉知外但祝行
旌指日回

軀生自昔返吾鄉共被沾濡未敢忘已分入山隨李廣甯思得路遇
王良精神况已輪騏驥心血惟堪飲鳳凰此曲賡歌無所讓爲公千
載被甘棠

自頃生涯集百憂二三寒峻與綢繆投軀未必人情薄舉足難禁世
慮稠獨喜安居託仁宇仍能儼嘯對洪流微儒戀戀真堪劇祖道相

望東海頭

斜飛雪用前韻一首

上帝沉沉醉有年春風無主晚來顛滄溟激蕩洪波起廣野蕭條落日懸誰辦癡心回大造但追詩思入重淵吟成更與斜飛雪如此穠華二月天

題胡子勤美人宮怨

漢武威權能棄婦故教喜怒費疑猜如今賦有長門手誰爲相如取酒來

江湖莫照驚鴻影滿眼存亡可淚零不及斯翁隱塵市發緘猶賸幾娉婷

善夫招西餐余辭弗飲因從容論戊戌以來事頗盡余意善夫

亦告余將隱富春山中卹然有同志焉遂次其韻

飢腸得飽最爲樂折柬招之萬無却更呼進酒胡爲然泛濫徒教淚
橫落愛身與國理則同激宕悲歌氣逾削寡緯不念宗周憂魯酒遂
爲邯鄲薄第一冥冥保太和慎固無成小人惡真能把臂事村農胥
吏何由恣苛虐子之論分庶幾說往矣富春花灼爚

范伯子詩卷十四

通州范當世

光緒二十六年庚子五月至桐城及閏八月至南昌作

送鄧璞君之山東因託余季

骨肉有同理肺腸相與陳水西一席話山左廿年塵閱代無聊後仁親未了身何因託余季惟以共悲辛

出郭

還家百不習出郭動微吟以此一閒放蒼茫入我心歡情不得煖復苦憂相尋曠然覽江海激水同悲音我今甫踰闕世禍未見侵徒緣死喪際泣下沾衣襟況其念來日四海無安林飄飄何所止慘慘孰能任甫白能言者當之亦恐瘖

集賢關

我行至安慶便憶咸同間
峨峨攻守具復有集賢關
何由搏狂寇冥想存茲山
一精策羣力接天猶能攀
當時寇焰熾非獨我能然
人智日不逮敵勢從而遷
乃知勝敗理豈不在愚賢
賢智所泮厲神鬼不能干
敬慎及枯朽戰端胡易言
齊德欲相服人盡知其難
譬以叢爾魯妄欲興大瀾
公然庇羣盜顯與列強翻
此雖五尺子不受斯言設
嗟嗟中興運短短無何年
大人龍虎氣一去不復還
鐘鼎已成故衣冠欲化豈
誰當與狂藥直使我心頑

題通伯所藏濂亭先生手迹一册

津門一掬傷心淚忍向天涯不再揮
持比古人真愧痛獨存今日易
歸依流連手迹尋常有接對心神曠
代稀三復君文剛戀戀又傷離

亂促征駢

題通伯所藏惜抱先生手迹卷子

慘澹斯人去山川亦不神
毫芒落君處悲涕逮吾身
論有當時定才爲異代
珍誰令杖朝歲猶作太平人

吾與通伯相思七年僅得見
於外舅之喪中又不得稍留中閒
又泣且病談世事則灰心短氣
讀其書則徒有浩歎并其夫
婦憐我之喪女欲以長女相嗣
爲却爲承亦未遑云也放手
而行能無痛淚

骨肉銜悲日華夷構難辰
與君成此別爲道益傷神
徧國皆誰賴皇天不我親
洋洋三古意惟以度宵晨

別有傷心淚眞如戀子何
人情死憐類勞者泣當歌
勿以生相問終

知命有頗掌珠虛惠我萬事總蹉跎

辭外舅靈几

身窮世季歲云徂更讀餘翁絕命書今日未應悲逝者一生無奈特
知余黃花晚節嗟難到赤縣神州不可居祇作無言揮弟姪了知夙
諾盡成虛

題桐城

歲歲桐城有夢踪清談既接又還家海峰薑塢尋常有不見龍眠與
掛車

抵安慶薄暮而雨遂改以明日詣方倫叔先去一詩

中興大業銷沉後舊德從容此一家却向城根結廬舍坐於江上看
年華清遊望斷天邊妨急節催殘日莫笳豈意皖公山下等閒先

被海雲遮

還家有迹前韻

志量區區今日盡八荒六合贖吾家可憐卽事歐心血孰使空談閱
歲華百郡文書仍置驛一江城郭有鳴笳洋洋海勢兼風雨何術能
將片笠遮

過焦山內人扶病眺望

斜陽冉冉天光好積水洋洋樹色酣欲問山靈此何世尙將晴翠撲
江南

臨江病眺莫傷懷不死終能爾我來放意存茲一片石世間何物是
樓臺

悠悠吟示江潤生太守三兄

帶甲滿江海飛蝗更蔽天民今在爐火官亦坐針氈急難嗟無位祈
哀恨少田從公且悠忽蟻命分同捐

贈江三兄

坦坦向人盡味之方覺深接交無不可知許我能任百口仍孤注千
秋並陸沉牢持燈火意悠悠見天心

答諸公要余至上海同謁李相

青天白日沉憂患遠水遙山送語言世有萬年身是寄民今百死我
何冤可憐黃髮承茲難甯惜丹心爲至尊後鬼前穢啼不已又能重
把劫灰論

答鄧璞君疊韻寄和遂以秋門行止相託

萬古無今日倉皇百變陳域中非樂土人命本輕塵近喜慈親腹能

忘愛弟身誰令千里外吾友獨艱辛

七月二十日挈罕兒往省外舅吳公疾自吾庚午孟秋入此門

恰三十年矣卽夜感賦

苦月臨宵轉轉虧昏燈倦眼對迷離當階瑟縮驚秋早引枕低回結
夢遲語世竟難寬病叟行身不得飯癡兒回頭快壻升堂日世載倉
皇到此時

磐碩大兄因亂棄官問道歸嗚咽有贈

誰言破敗無今日不忍流離到此人萬死能除歸有父百方欲聘往
無親萍蓬散落甯非分瓜果娛嬉復此晨最痛吾皇在幽闕更聞臨
亂道艱辛

因磐碩兄歸賦呈草堂伯父

丈人吾父類不忍想須眉頃自兄歸後忽然夢見之壺觴天地窄談笑死生遲不得同趨往歡然出涕淚

聞說

聞說雞鳴驛吾皇昨駐茲移家無百乘遮道有羣蚩
喉曠虛臣盡艱危仗母慈風狂兼月黑惟以涕漣洏

八月十二夜乘車至港念昔秋去滬而今春返皆無幾時世變
遂已至極感痛不可以言詩以記候

急火炊梁梁不熟大千糜爛一何神可憐目斷前星日亦是身遊太
古晨鄉土終爲覆巢卵嬰殪猶累倚閭人涼風八月宵如昨一往無
由問屈伸

至滬謁李相

天津回首陣雲屯
重向江頭謁相門
天意尙能留碩果
人間何處起貞元
耆年往復乘衰運
老淚滂沱有笑言
一事告公時論定
八州生類賴公存

讀

皇上罪己詔

可憐鹿馬迷淒後
慘澹無言到聖仁
一昔驚聞詔罪己
萬方流淚善歸親
問安已過雞鳴驛
失路應悲螢火津
最痛三良前死殉
至今欲賸亦無身

思婦

思婦江南音斷朝
朝只欲去燕山
空彫翠袖黃塵裏
甯返朱衣玉殿閒
魚尾秋來河水赤
鵲橋天上鬢毛斑
人閒信有無聊事
觸緒千

言意不嫻

不信

不信江山如錯繡更無奇策建堂堂威公老去貂牙在蒙氏蹉跎勝
廣強一馬十牛愁未已羣鴉孤鳳泣何將由來忠孝須明眼獨對昏
燈淚萬行

訓蘇松太道余晉珊一兄

百金惠我亦云泰摯語溫言值萬金踐土傷亡至今日向人啼餓我
何心人才虛乏古無是儒術蕭條公可任小雅未忘交道美老民端
不患夷侵

養疴廡樓苦雨吟眺

客病艱難不可說淫霖衰颯更堪聽樓居密密連雲黑燈火蕭蕭向

日青歌哭萬家聲
闕寂飄搖獨樹影
伶俜正愁風雨乾坤大
蟻穴侯王夢未醒

題王莽傳後

不用軍齋水不濡
一飛千里却匈奴
沉酣六籍猶能信
何況胸中一字無

白石丹書拜自天
寶黃廝赤分應然
可憐一壘卷卷壚
仍肯悲吁漢臘邊

搏擊誰爲繞指柔
恂恂只數博山侯
儒生膽怯真無奈
誰見庭前滄海流

名都一日化爲塵
忍死誰能作幸民
朱弟張魚雖放曠
差強不是藁街人

上海縣丞羅耀廷之母劉同治癸亥殉難徵詩

承哉一歎意如何不爲沉淪感逝波四十年來萱草恨要將椽筆補

山阿

由來阿母承家日關陝重重寇正狂提挈同懷携弱息當時臨難極
芬芳

吾宗實始揚彤管吾亦荆襄作志來授命多於文武士誰言巾幗少
人才

孝子母爲恨不鏤於今烈殉滿幽燕王師寇盜終無別何處恩綸降
自天

讀王貢兩龔鮑傳而歎

漢家遂少山林逸不者窮愁未得之四皓荒唐無此物兩龔傲睨欲

何爲遊於世上真無奈問我胸中亦不奇要覓君平一簾地百錢誰
向汝稽疑

漫興再成

鬢邊日耗兩三絲試以閒情澹蕩之入市觀人意色決臨鴈述事見
聞歧黃雞白日淒迷慣鐵馬金戈微幸爲要問古來興廢際幾人富
貴不流離

寄慰又樓喪子

患難交情罄意輸夜燈兒女共悲愉未堪愛子一朝死虛累老翁終
歲劬達識固當緣漆吏愁心不必動玄夫承家有美君何患樹也宜
爲賦輦徒

浮雲

浮雲西北是何鄉歌管樓臺浩莫望私淚向來甯我忍褊心今日耐
君狂布衣疏食爭微命厚地高天總一王徑欲沿江窺節使幾人露
次待嚴裝

舉少浦爲愛滄課子見其賓主酬唱而亦和焉

乍見保生懷袖稿一詩會合主賓初未因養士聊添債無奈生兒且
讀書辟地甯非覆巢外瞻天仍是戴盆餘侯官耿耿明忠孝國恥終
望爲掃除

晉珊遷官當去此吾州人賈此者既惜其行此間姚子讓張芝
舫益上書督府籲留之故爲循良詩再贈

世上萬般都有價更無善價買循良撐持大局羣謀共保抱蒸黎獨
念長百族喜心三握髮六街生事九迴腸時艱未泯公當去徒苦吾

人淚萬行

汗

一雨從容汗竟收
歲華從此入深秋
山河表裏塵初上天
漢東西水不流
白骨青苔淚纏繞
黃金丹藥死追求
拔山自古非容易
尺二書中語盡頭

或傳摯父先生適冀州或曰渡海東矣苦憶成詩

離亂奚從問故交
傳聞消息太喧嘩
桐鄉豈遂營生壙
遼海安能避覆巢
遊宴八年悲喜盡
湛冥萬古死生拋
嗟麟泣鳳皆虛語
何物人間是愈郊

嘲吳彥復

蓬蒿鬱鬱豈能終
枳棘榛榛所向窮
一日歎然逢旅鴈
不知依舊落

蘆中

附輪往江西始發風雨大作船卽播搖不可當

誰道兩輪風雨纏緣江試浪已狂顛長艙空廓腹無有前路漂搖心
正懸小盜近人還作祟窮儒歷世總由天宵來略仿孩提意正得酣
然一响眠

客言拳匪頗竄匿吾州或曰富有黨也雖未遽信心竊憂之過
蘆涇港因歸人寄弟友

風鶴流聞豈遽患安危從古在防閑獻儀九萬蓬沙似賓客三千草
露閒障海從容失天險過江嗚咽念家山臨門不入胡爲者匍匐陳

辭未忍刪

余此行專爲伯
嚴遭父喪赴弔

讀史二首

輿無隄 東方朔傳

輿無隄東海之東西海西黃金白璧任汝攜遂極丹聖營樓題目有
所侈心神迷直戮麟鳳如犬雞任意撻伐羣皇低京師喧喧戰鼓聲
倉皇萬乘親塗泥潸然淚下聞烏啼今我乃在臣民棲臣朔昧死言
誠哉輿無隄

功無原 王莽傳

功無原身都將相不可言遂參宰衡貳至尊天下有急哀王孫生民
死心戴厚坤何哉一日齊崩奔薄海內外傷心魂披髮大叫天無闢
千齡萬代無茲冤方知彼媚子泛攬徒貪恩陳崇爾何知誠哉功無
原

和愛滄贈洪蔭之詩三十七韻

閏八月北征杜甫以詩哭今我益飄微天南與馳逐江行一千里揜
遏未送目不忍喪亂餘見此承平福瀕行攜君詩愁來把之讀含靈
必不安母曰爾我獨生民固當哀賓旅義須睦方其達權時迂生拜
且祝亦云行奮揚不耐坐頻頗久之寂無聞眼中換陵谷君側古所
難當吾亦羞縮機有窮而生事有變之速大哉何生言一語轉坤軸
劫遷吾皇者大小盡可戮提兵必元宰從驅盛羣收轉輸屯荆襄灑
掃待黃屋日出羣陰消雷聲四夷服胡然再不圖倉卒求歸宿嗟峨
挾虎衛脣碎用雞卜恐其遂益災豈徒笑綠木羣公亦有言吾今諂
管叔聖明豈在多著語定含蓄審知薄海讎堂堂正心腹洪生亦有
言吾今方削牘付茲一个臣儻無惜令僕激切當天心庶以救顛芻
哀哉時已過焉用再三讀我語二君者凡今宜韁匱玄黃故未交純

陰在初六天方晏且溫地有反乎覆亂絲十年數吾已計之熟大命
如將傾挈家並沈陸不則備自全餽盡繼以粥商山無華芝空谷有
修竹慎勿輕投驅彈珠向飛肉平生所經歷朗朗列圖幅不識京華
門何從憂輦轂

九江遲船悵望伯嚴

壯日吟朋呼嘯處却扶衰病又經過國聞家事皆拋撇離合悲歡一
剎那雨不入江秋水淺樓剛出市夕陽多哀來獨眺西山友濡滯依
然奈爾何

偶書車丞相王章亦無聊之極思

雪消冰解一言中貴壽從容報亦豐試看收威暴公子依然一芥斷

西風

皇天老眼未全殊，獨歎王章一肯無。
畢竟妻兒還郡日，報之萬斛海南珠。

月食

月食不以朔，日食不以望。青天何物來，推求亮知狀。
漢儒好深思，不應踵虛妄。亦云帝皇貴，庶獨天與抗。
女禍毋浸淫，三公絕驕亢。爲利苟若茲，宜其百世尙茫茫。
大塊間重昏，入迷障。迄無堯舜明，厥惟勢衰王。
何代無賤儒，談多不必諒。根風定無虞，許班或深創。
安昌與博山，酣然白頭相。我昨窮呼天天，言此其僭縮。
手終奈何百方，祇惆悵九江登舟，照水有感。是日齒痛尤劇。

江水載船船載客，公勞跋涉爾何人。
心神憔悴何論貌，齒病浸淫欲到脣。
却飯不妨饑，屢屢受風奚以嚏。
頻頻人間澈骨，捐除者念我惟

應有一陳

出門所遇多京師間道流落不堪之人舟中連榻一人談尤痛
徑從海角揚帆過誰肯紆迴路幾千今日子身流落者多言間道死
傷邊豺狼異域紛當戶鸞鶴中朝盡化烟草莽微臣百不曉祇知昨
日是堯天

鄱陽湖中感念昔日與內子同吟寫詩寄與益悲思外舅

湖山自明秀雲日儘從容惟有往來者如分今昔蹤人閒屬喪亂母
氏待殮喪撫此微吟會嗟無妙侶從皇天資老大白首與橫縱愴若
翁之德千秋不再逢

臨入湖口眺望

蕩蕩秋天且散懷上窮湘漢下江淮愁聞詩料添猿鶴喜見人烟沒

虎豺吾願一言過李息世無三疏問王涯西山却有靖廬在安得湛
冥百歲偕

抵章江門投詩張筱泉方伯

昔游今狀舉難陳眉壽勳名屬世臣帶郭帆檣聲近市涉江絲管氣
如春堯都近有巡方費漢柱應須主計人篠蕩瑤瓊眼前事儻無餘
暇更延賓

贈張篤生昆季

富平家世兩郎官只待鵬風萬里搏不意君門長荆棘更來子舍作
芝蘭前時始識瞻由會記否高文瑜亮看老病摧傷百無似強顏一
問過庭歡

讀嚴朱吾丘主父傳

嚴朱吾丘主父倫不求五鼎亦亡身可知避病空居者未算尋常行
路人侮弄富兒裁自脫俳優公等太無因楊雄亦是傷心客何怪低
頭鄭子真

西山靖廬弔伯嚴悲思右銘姻伯作傷秋五首次韻杜甫傷春
秋色已如此山光正爾濃天高有晴雨野僻祇豐凶江海烽千里京
津寇萬重還虞孔道斷仍缺尙方供客子言紆恨貞臣死燧容誰將
救時溷雲裏喚飛龍

鳳翔前時弱天南託一枝恩深與塗地殃重忽連池事往餘身在臣
安念主危大波平地起雖覽巨天垂法戮羣強怒邦崩萬象離彌留
深谷日泣聽轉透迤

大國誅奸緩兵來不合囿言從兩宮去坐失百年機帝已成奇貨軍

猶擾近畿傳車紛送食持節復徵衣斑豹全身見蒼鷹老眼稀江湖
日夜上令我亦無歸

不有英雄策何能權世真一匡先管仲六國後蘇秦束縛悲天子顛
連及貴嬪江河任東下車駕自西巡禍極生民日寃歸守土臣陳蕃
至今在言語豈輕塵

麻衣相哭罷餘恨萬千多乍見郵中字還與室內戈望烏無止屋歎
風有臨河惻惻履霜操淒淒薤露歌窮鄉得蔬米危塹倚松蘿不死
且須惜看看睡夢和

於人扇頭見乙未春州南閱練勇時所題雙柑斗酒二絕回首
當時已成盛世感而疊韻並存之

綠楊陰裏試褰旗立馬江風著意吹終是角聲悲入耳不如斗酒自

聽鷓

問君識字何無患
春至徜徉更不疑
直去深村拚酩酊
世間理亂本難知

八風面面繞靈旗
甲士雲屯畫角吹
只待蒼鷹向空闊
不知深樹倚黃鸝

小方角觸已無效
戰禱倉皇竟不疑
莫辨諸臣有何術
人間秘事總難知

靖廬旁有豺食數人矣

世間甯少汝向客口
呀呀昔所生吞者
知其無告耶塵荒山
不綠雨至稻無芽復
此那堪耐安排獵火
遮

靖廬右銘先生歸隱處在其墓旁感而有述

昔我勛卿處喪亂一椽自署墓旁人嘗記小時上邱隴閱之曠野泣
忠臣今來塵榻已千古留與荒山作四鄰隔代茫洋蕭瑟意貫穿吾
欲勒貞珉

望西山

長啼淚亦乾殘日望西山蒼鬱是何景怪奇殊未嫻龍螭交壓伏彝
鼎肅斑斕作者揚劉氣宗臣馬范顏雲霞斷烘託壑谷忘躋攀遂與
天微異應趨海不還茫然下弦月何以照人寰

寫西山色

只道青山青不極甯知勝賞欲無窮丹華杳與晴曦溢紫氣沉爲暮
靄隆雨晦更成純白體月明如入太玄中閒時亦作籠煙態連日樓

臺澹澹風

既作孝婦墓碣遂登前山觀所謂趙家塘者

晴廬所屏蔽摺疊萬峯齊試上前坡望方知近者低晴嵐與迴合細
草任攀躋路轉風能聚塘分雨可犁誠然舉目快莫奈我心悽一撮
黃封處將爲兒女棲

晤前護陝西巡撫李香緣示以請建陪都一疏頗自惜其言之
不用也

陪都一疏倘無留車駕西行百不憂墨經出門心未已素冠相對淚
橫流文章糞土悲揚馬鈎黨紛綸痛李牛安得從容待君起多爲陝
治發棠諷

晤徐次德以昔所爲方影圖索題蓋皆效余去影圖而屬馮君
小白畫者甲午之役余薦小白襄衛汝成軍事遂去不復返

而戲爲鬪影圖之閑伯亦死四年矣發鬪感絕援筆遂成

昔我聊爲去影圖姚氏因之作鬪影馮生異日至天津徐君復以斯
圖請爲方爲鬪亦何勞吾今一任去滔滔流連杯罍青陽盡彌望郊
原白骨高馮生莫知死何處姚氏硯墨歸兒曹人間七年愈何世重
在章江把君袂情話雍容足散懷圖書一發紛流涕誰歎棒佛放悲
音惟有去來無見今權時把玩渾無術獨抱涼涼萬古心

次德以椒丈歸廬譚往見示戲題二絕

王侯歷抵不知年頭上腰間並缺然莫笑寶山空手反譚餘君看腹
便便

臺諫紛綸巷議多誰從此老細研摩平生亦有胸中塊欲吐深愁起
大波

贈擊甫先生之兄子長文

世路雖云百倍難相逢忍作主賓看果然尚守吳公舊居此猶憐范
叔寒別後諒能崇至教亂來何處著微官僧房數米從今始歧路相
拋老淚彈

閔女壻陳師曾諸近作

至其畫菊爲吾女遺照
而題四詩潛然有述

譽汝詩文至悼亡人間無有此情傷徒緣罔極呼天痛更爲同懷引
恨長

細蛛之早逝
更痛於菊兒

遂以鴻毛淪我愛不圖麟角爲茲狂秋心不與穠

春謝從此東籬歲歲芳

因感傷細妹作一詩以自警

平生痛絕無言處過後遺亡行路同不若平心就中制勤勤毋以情

成空

師曾之友蔡公湛感慨時事屏棄舉業投詩問學於我次二首
以答極道傷心之語不敢欺蔽少年也

遊人屈伏屋廬底高閣滕王不敢瞻苦憶中原就塗炭喜聞後輩有
沉潛鯨吞繼作君無異虎嘯龍吟氣正嚴要識吾人真猥穢甫能卽
事下鍼砭

文章韻事終無讓何況昌黎與子瞻却有一番釐訂在不教萬智此
中潛明明絲粟童而習赫赫尊彝性所嚴要與窮觀百年後儒生劇
病始能砭

九日

登高望遠訪何年而我於今足不前節遽祗堪借送日蓬飛無力再
浮天思親可但滄江上憶弟甯徒青岱邊遍把神州墮烟莽擁衾猶

覺淚如泉

有人招登高飲宴不赴

九九定爲何等節三三五五一般能盛時鴈詠多如此末世干戈見
未曾早計不逢新建伯前游翻憶大頭僧

前年廣州重九登白雲山與能仁僧久談

東南

盡付昏庸手約束離堅禍恐仍

別張篤生江子嘉

頻因弔問添游覽還以亂離成合并元伯故人知我者文通薄宦可
憐生江湖片壤猶能國風雨重陽欲滿城但可勤襄父兄處勿於憤

客惜勞征

南昌令江雲卿子嘉兄也

奴迹

蟾蜍車轍蟬游樹萬古應無一倖存笑爾深心欲撓我千回百轉實

人言

敬題事實妃所書屏翰二字

藩署故甯王府也字在門楣

婁妃不與甯王逝大字輝輝在戟門想見扶携宮婢日暗思探掇聖
人言於今朱氏無炊火何處青天著墨痕女德萬年看不厭撫膺百
感淚渾渾

贈羅邠峴

纔從別傳徵先德復以來賓見此奇不作波瀾寫聲勢一襟如海少
人知

祇以吾甥君外甥同舟相泛若爲情等閒鷗鷺成鈎黨何處天涯求
友聲

吾弟昔從君弟游廬山詩句各清適今朝兩老推篷望五老平添一

段愁

迎面蕭條正北風
憐渠瘦影月明中
孫郎帳下誰奇雅
王粲西來遇亦窮

伯嚴卒哭同行舟中有贈

憐君似我無根蒂
仍向江山淚眼開
雲物徒供一身老
干戈更殺百年哀
蓬風捲髮垂垂盡
蠟炬燒心寸寸灰
作述從容要三世
贖容泣導後生來